



Kamis, 10 Agustus 2023

Ogen: Masmur 67:7-8



ENGGO IBEREKEN TANEH ULIHNA



Wari enda siperingeti hari 'biofuel' se dunia. Biofuel e me bahan bakar si idatken arah sinuan-sinuan, organic ntah pe olahen limbah bagi sampah rumah tangga, industry ras ulih pertanin. Lit ka arah fermentasi limbah e me kotoren hewan ntah tebu ras sidebanna. Enda umumna igunakan jadi bahan bakar kendaraan ras kegiatan rumah tangga contohna erdakan. Benana Biofuel enda ibahan erkiteken enggo urakna hasil minyak doni enda, emaka idarami ras iukuri sumber bahan bakar si deban. Enda jadi bahan bakar alternatif selain minyak siidatken arah fosil nari, sabap iperluken waktu si ndekah i ja fosil erproses jadi minyak. Selain prosesna si pedas, biaya produksina rendah, ramah lingkungan, amin lit ka nge kekurangenna. Bahan enda salah sada sumber energi si nampati kal guna ngatasi krisis iklim dunia. Janah negaranta jadi uruten si petelukan si mproduksi bahan enda.

Manusia arus tetap rukur guna njagai kegeluhenna rikut doni inganna nggeluh. Arus ndarami erbage alternatif si banci ngkurangi cedana doni si itepa Dibata gelah ntabeh denga iakap manusia nggeluh i je. Sabap doni enda reh lasna. Rikutken kecibal si bagenda ibabai kita guna ngidah ras nggejabken maka seh kal buena ulih tanah inganta nggeluh, erdahin bage pe erasuh-asuhen. Bage me cara Dibata nikapken kerina keperluan geluh manusia arah pasu-pasuNa. Pemasmur ngidah ras nggejabken enda kerina, amin dampak kemajun ku paksa sigenduari enda langa bo idahna tapi ietehna kuga Dibata ncukupken kerina si perlu man doni enda. Mari sigejab maka kerina isi doni enda banci si usahai guna kiniulin ras kemajunna amin labo kerina kita ngasup ndatken erbage-bage pengembangan alo ngolahsa alu luar biasa tapi ikut kita ngenanamisa ras njagai tanah si enggo mereken ulih man banta.